

दिनांक 08.05.2025
समय: 18.48 बजे

आकाशवाणी जयपुर—अजमेर

प्रादेशिक समाचार

- फौज कानी ऊं चलायी ज्या ऑपरेशन सिंदूर पाछे उपजा हालात बीचे सरहद ऊं राजधानी तांई हलचल बधी— प्रधानमंत्री आला दर्जा री मीटिंग लीनी।
- रक्षा मंत्री राजनाथ सिंह फौज री बहादुरी री सराहवणा कीनी—कह्यो—भारत री संप्रभुता री हिफाज़त करण मांय कोई सीमा अड़चन नी बणेला।
- पाकिस्तान सागे तणा—तणी बीचे प्रदेश मांय हाई अलर्ट—सरहदी ज़िलां मांय खास सावचेती राखण सागे जनता ऊं अफवाहां ऊं बचबा री अपील।
- राजस्थान माध्यमिक शिक्षा बोर्ड रीट इम्तिहान रा नतीजा रो ऐलाण कीनो— 6 लाख 36 हजार परीक्षार्थी पास व्हया।
- बूंदी मायं आज व्हया एक सडक हादसा रे कारण पांच जणां री मौत— बीकानेर गैस सिलेंडर हादसा मांय ई मरण वाढां री तादाद बध र आठ व्ही।

0000

प्रधानमंत्री नरेंद्र मोदी देश री हिफाज़त ऊं जुड्या हाल रा वाकयां ने ध्यान राखता थकां आज न्यारा—न्यारा मंत्रालयां अर विभागां रा सचिवां सागे मीटिंग कीनी। मीटिंग मांय प्रधानमंत्री मौजूदा हालात मांय मंत्रालयां री योजना अर तैयारी रो जायजो लीनो अर मंत्रालयां ने राज्यां रा अहलकारां अर ज़मीनी स्तर री संस्थावां सागे तालमेल राखण बाबत् कह्यो। प्रधानमंत्री देश रे संवेदनशील दौर ऊं निकळ्बा रे दौरान लगातार सावचेती, तालमेल अर साफ तरीका ऊं जाणकारियां लेवण—देवण सारु कह्यो। मीटिंग मांय कैबिनेट सचिव, प्रधानमंत्री रा दफतर रा आला अहलकार, रक्षा, गृह, विदेश, सूचना अर प्रसारण, बिजली, स्वास्थ्य अर दूरसंचार समेत खास—खास मंत्रालयां रा सचिव शिरकत कीनी।

000

फौज कानी ऊं चलायी ज्या ऑपरेशन सिंदूर रा बारा मांय जाणकारी देवण सारु आज संसद भवन मांय सगळी सियासी पार्टीयां री मीटिंग बुलायी ज्यी। रक्षामंत्री राजनाथ सिंह री सदारत मांय व्ही मीटिंग मांय श्री सिंह पाकिस्तान अर वां रा कब्जा वाढा कशमीर मांय नौ आतंकी ठिकाणां माथे भारत री कार्रवाई रा बारा मांय जाणकारी दीनी। मीटिंग मांय सियासी पार्टीयां रा नुमाइन्दा आतंकवाद रे खिलाफ़ भारत री फौज री कार्रवाई री सराहवणा करता थकां एक राय ऊं इण री हिमायत कीनी। खबरनवीसां सागे बातचीत करता थकां संसदीय कार्यमंत्री किरेन रिजिजू मीटिंग ने रचनात्मक बताता थकां कह्यो के हर नेता देश सामी मौजूदा चुनौती ने समझता थकां ज़िम्मेदारी सागे विचार बताया।

कांग्रेस रा अध्यक्ष मल्लिकार्जुन खड़गे कहयो के ई मुद्दा माथे वां री पार्टी सरकार री पूरी हिमायत करे है।

लोकसभा मांय विपच रा नेता राहुल गांधी ई एडी ही बात कही। मीटिंग मांय गृह मंत्री अमित शाह, विदेश मंत्री डॉ. एस. जयशंकर, राज्यसभा मांय सदन रा नेता जे.पी. नड्डा, समाजवादी पार्टी रा राम गोपाल यादव, तृणमूल कांग्रेस रा सुदीप बंदोपाध्याय, द्रविड़ मुनैत्र कड़गम रा टी.आर. बालू, लोक जनशक्ति पार्टी रा चिराग पासवान समेत तेलुगूदेशम, जनता दल युनाइटेड, राष्ट्रवादी कांग्रेस पार्टी, शिवसेना, सीपीआईएम, बीजू जनता दल अर राष्ट्रीय जनता दल रा नेतावां समेत कई नेता सिरकत कीनी।

000

रक्षामंत्री राजनाथ सिंह भारत री फौज री बहादुरी री सराहवणा करता थकां कहयो है के देश ने फौज माथे नाज़ है। वे आज नई दिल्ली मांय राख्यी ज्या राष्ट्रीय गुणवत्ता सम्मेलन मांय बोल रह्या हा। रक्षामंत्री फौज कानी ऊं चलायी ज्या ऑपरेशन सिंदूर ने माथो ऊंचो करण वालो बताता थकां कहयो के गर कोई म्हाणा धीरज री परीक्षा लेवे है तो वां ने भारत री कार्यवाही सामो करण सारु तैयार रेहवणो चाहिजे।

000

पाकिस्तान री ओर ऊं बीती रात देश रा उत्तराद अर आतूणी एयरबेस समेत कई फौजी ठिकाणां माथे हमला री कोशिश ने भारत रो एयर डिफेंस सिस्टम नाकाम कर दीनो। सरहद पार ऊं राजस्थान रा उत्तरलाई, फलौदी अर नाल एयरबेस समेत देश रा 15 एयरबेस अवंतिपुरा, श्रीनगर, जम्मू, पठानकोट, अमृतसर, कपूरथला, जालंधर, लुधियाना, आदमपुर, बिंदा, चंडीगढ़ अर भुज एयरबेस माथे हमलो करण री कोशिश करीजी। हमला ने इंटिग्रेटेड काउंटर यूएएस ग्रिड अर वायु रक्षा प्रणालियां बेअसर कर दीना। पाकिस्तान री ओर ऊं प्रदेश रा उत्तरलाई, फलौदी अर नाल अड्डा माथे हवाई हमला री नाकाम कोशिश बीचे प्रशासन लोगां ऊं सावचेत रेहवण अर झूठी खबरां अर अफवाहां माथे ध्यान नी देवण री अपील कीनी है। म्हाणा बाड़मेर खबरनवीस बतायो के शहर मांय पुलिस री गश्त बधा दीरीजी है अर उत्तरलाई ओड़ी जनता रो प्रवेश रोक दियो ज्यो है।

बाड़मेर मांय आज रात 09:00 बज्यां ऊं काल तड़के 4 बज्यां ताई लाइट्स नी चासबा रा हुकम दिया ज्या है।

म्हाणा फलौदी खबरनवीस बतायो के वठे हाल रा घटनाक्रम पाछे जनता री आवण—जावण री ठोड़ां और जवान तैनात करी ज्या है अर आपदा प्रबंधन दलां ने अलर्ट मोड माथे राख्यी ज्या है।

000

पाकिस्तान रे खिलाफ़ काल सरु करी ज्यी भारत री कार्वाई पाछे राज्य सरकार पूरी सावचेती राख रही है। गृह विभाग सगळा जिला कलेक्टरां अर एस.पी. ने गाइडलाइन जारी कर र आपदा प्रबंधन ऊं जुड़ी तैयारियां मज़बूत करण रा हुकम दीना है। कलेक्टरां ऊं आपात हालात मांय अस्पतालां मांय दवाइयां री उपलब्धता तैय करण, ईलाज ऊं जुड़या कर्मचारियां ने झूठी माथे तैयार रेहवण अर ब्लड बैंकां मांय खून रा हर भांत रा ग्रुप री ज़रुरी तादाद राखण सारु कही ज्यो है। ई सागे ई अस्थायी अस्पताल अर राहत शिविर बणाया जावण लायक स्कूलां री पिछाण करण बाबत् ई कही ज्यो है। सरकार सोशल मीडिया माथे निगराणी बधावण रा ई हुकम दीना है। पुलिस ने देश विरोधी अर भड़कावण वाला पोस्ट करण वालों रे खिलाफ़ तुरत कार्वाई करण रा हुकम दिया ज्या है। गाइडलाइन मांय रोजमर्रा रा सामान अर सेवावां ने चालू राखण अर कालाबाजारी माथे ई निजर राखण बाबत् कही ज्यो है। राज्य रा सरहदी जिलां रा कलेक्टरां अर पुलिस रा अहलकारां ने फौज अर दूजी केन्द्रीय एजेंसियां रा अहलकारां सागे लगातार संपर्क अर तालमेल राखण सारु ई कही ज्यो है। पाकिस्तान री सरहद ऊं लाग्योड़ा गांवां सारु ई आपातकालीन निकासी योजना तैयार राखण रा हुकम दिया ज्या है। किण ई भांत रा हमला रा हालात मांय आं गांवां ऊं जनता ने हिफाज़त सागे निकालबा सारु पूरी योजना अर साधन तैयार राखण सारु कही ज्यो है। आपात

हालात मांय सामाजिक संगठनां, एनएसएस रा खुदसेवकां अर एनसीसी कैडेट्स री मदद लेवण सारु ई कही ज्यो है। सरकार जनता ऊं संयम राखण अर ज़रूरी तैयारी राखण री अपील कीनी है। ई बीच प्रदेश रा सरहदी ज़िलां मांय स्कूल—कॉलेज बंद रहया, जदके जोधपुर अर बीकानेर समेत कुछ शहरां ऊं उड़ानां टाळ दीरीजी। जयपुर हवाई अड्डा ऊं ई कुछ उड़ानां रद्द कर दीरीजी।

000

000

राजस्थान माध्यमिक शिक्षा बोर्ड अध्यापक पात्रता परीक्षा—रीट 2024 रा नतीजा रो ऐलाण कर दीनो है। बोर्ड रा सचिव कैलाश चंद्र शर्मा बतायो के रीट लेवल वन मांय 62 दशमलव तीन तीन फीसदी अर लेवल टू मांय 44 दशमलव छह नौ फीसदी उम्मीदवार कामयाब रहया। वे बतायो के दोन्यू लेवल मांय 50 दशमलव सात—सात फीसदी उम्मीदवार सफल रहया। ध्यानजोग है के 27 अर 28 फरवरी ने लिया ज्या ई इस्तिहान मांय 13 लाख 13 हजार 633 परीक्षार्थी शामिल व्हया हा। लेवल वन मांय 1 लाख 95 हजार 847 जदके लेवल टू मांय 3 लाख 93 हजार 124 उम्मीदवार पात्रता हासिल कीनी। रीट परीक्षा मांय पास व्हेवण वाळा अब प्राइमरी अर मिडिल स्कूलां मांय शिक्षकां री भर्ती सारु मुख्य परीक्षा मांय अर्जी दे सकेला।

000

बूंदी मांय आज हाइवे नम्बर 27 माथे माटुंदा गांव कने एक मोटरसाइकिल सवार ने बचावण री कोशिश मांय ट्रैक्टर—ट्रॉली पलट जावण ऊं पांच जणां री मौत व्हे ग्यी अर पन्द्रह जणा जख्मी व्हे ग्या। जख्मी लोगां ने बूंदी अर कोटा रा अस्पतालां मांय भर्ती करायी ज्या है। पुलिस रे मुजब हादसा रा शिकार लोग चौतरा का खेडा गांव रा रेहवासी हा जो ब्याह मांय जा रहया हा। लोकसभा अध्यक्ष ओम बिरला अर मुख्यमंत्री भजनलाल शर्मा हादसा माथे दुःख जताता थकां जख्मी लोगां रे बेगा ठीक व्हेवण री कामना कीनी है।

000

बीकानेर मांय कोतवाली हलका रा मदान मांय काल गैस री टंकी ऊं गैस रिसाव रे कारण व्हया हादसा मांय मरण वाळां री तादाद बध र आठ व्हे ग्यी है। आज घटना री ठोड़ ऊं पांच और लाशां निकाली ज्यी। काल तीन लाशां बरामद करी ज्यी ही। ध्यानजोग है के काल हलका री एक दुकान मांय गैस री टंकी मांय लीकेज रे कारण धमाके व्हे ग्यो हो। राज्यपाल हरिभाऊ बागड़े हादसा माथे गहरो शोक जताता थकां मरण वाळां रा पिरवार वाळां ने सांत्वना दीनी अर ज़ख्मी लोगां रे बेगा ठीक व्हेवण री कामना कीनी। मुख्यमंत्री भजनलाल शर्मा ई ई हादसा ने घणो दुःख देवण वाळो बताता थकां शोक जतायो है।

000

प्रदेश मांय आज कई ठोड़ां आंधी आयी अर बिरखा व्ही। आज राजधानी जयपुर समेत ऊगणी ज़िलां मांय कई ठोड़ां बारिश व्ही। सवाईमाधोपुर अर आरे—सारे रा हलका मांय ई आज बिरखा व्हेवण ऊं मौसम सुहावणो व्हे ग्यो। चूरू ज़िला रा गांवाई हलकां मांय ई कई ठोड़ां बिरखा व्ही। उदयपुर संभाग मांय ई आखा दिन बादला मंडया रहया अर सीढ़ो बायरो बाज्यो। भीलवाडा मांय दोपहरां पाछे कई ठोड़ां तेज़ बारिश व्ही। मौसम विभाग रे मुजब आवता पांच—छह दिन ताँई पारो नरम रेहवण रा आसार है। विभाग रे मुजब 13 मई पाछे अंधड़—बारिश कम पड़बा सागे गर्मी रो ज़ोर बधबा री संभावना है।

000